

Presentacion di buki di Parlamentario Lampe na Corsow

ORANJESTAD - Na Biblioteca Publico di Corsow a tuma lugar e presentacion di e buki di Parlamentario Lampe, cu tin como titulo “Mi ta djis cumpli cu mi deber. Balornan cu a guia mi di sacerdote pa politico”. Riba e portret por aprecia e comentaristanan di e obra, entre otro drs. Richard Hooi (conosi tambe bao di e number di poeta Yerba Seco) y mgr.dr. Amado Romer. Tambe ta aparece riba e portret e presidente di e union di sindicatonan, sr. Alcides Cova, y coordinador di Plataforma Agrario Nacional, sr. Eugene Godfried. Dilanti un publico representativo Pader Romer a presenta e obra di Parlamentario Lampe. Nos ta reproduce parti di e discurso di Mgr.dr. Amado Romer:

“Den hustificacion pa su eschoho pa politica na Aruba su pais natal, pader dr. Rudy Lampe ta expresa su



responsabilidad personal... Pader Lampe ta muestra e manera di pensa personal como sacerdote y como politico, con e ta mira un sacerdote y su actuacion den politica. E ta trese dilanti su punto di bista y su interpretacion di Santa Escritura pa muestra cu realmente no ta asina asina un

sacerdote ta opta pa y scohe un rumbo cu no ta e practica normal den Iglesia. E ta bon conciente di su actonan y tur consecuencia cu esei por trese cu ne. Sinembargo libremente e ta hasi su eschoho. Aki ta conta respet pa e consenshi (forma) di un hende cu no ta core

hasi, pero cu ta usa su sinti y conocimiento di e realidad historico di su pais, di su situacion, su posibilidadnan. Den curso di historia di Iglesia, prinsipalmente ora cu e “doctrina social di Iglesia” a cuminsa haya forma nos haya figuranan mas o menos controversial den Iglesia

manera un Obispo Ketteler, cardinal Manning, kendenan a scoge banda di obrero y hobennan. Den politica: mons. Nolens y Schaeppman na Hulanda y na Italia e famosissimo politico don Luigi Sturzo cu mester a bai for di Italia, pa instigacion di obisponan italiano, pero cu awor Iglesia hasta kier hales na honor di alta, esta declare santo. Na Santo Domingo hasta un Obispo tabata presidente di su pais pa un tempo. Ultimamente tabata hopi mes e figuranan di sacerdote politico, manera pader Lampe mes ta menciona...”

Te aki parti di e discurso profundo di pader Romer. Despues di e discursonan, e publico por a adkiri un ejemplar di e buki y risibi e firma di e autor. Nos kier expresa un biaha mas nos gratitud na e pueblo di nos hermana isla di Corsow.